

SOLAT JEMPUTAN AGUNG DARIPADA TUHAN

Platform berkomunikasi terus dengan Allah SWT

Bersama
Dr Syed Sultan
Bee Packeer
Mohamed



S

Dialah
sebaik-baik
tempat untuk
kita mengadu,
merintah serta
mencari
penyelesaian
kepada semua
masalah yang
kita hadapi



olat ibadat yang paling tinggi kedudukannya di sisi Allah SWT sehingga dianggap tiang agama. Bukti keistimewaan ibadat ini ialah kefarduannya diterima oleh Rasulullah SAW pada peristiwa Israk Mikraj di Sidratul Muntaha. Ia tempat Rasulullah SAW adalah satu-satunya makhluk Allah yang dapat sampai ke situ.

Namun, apa yang berlaku hari ini amat membimbangkan apabila kita membayangkan berlaku normalisasi pengabaian solat dalam kalangan masyarakat. Kita dapat melihat ramai lelaki Muslim masih berjual beli di pusat beli-belah, menjamu selera bersama keluarga di restoran dan berehat di taman rekreasi ketika azan solat jumaat berkumandang.

Gejala ini tidak boleh diremehkan kerana solat adalah ibadat wajib dilaksanakan dalam apa jua keadaan selagi seseorang itu masih bernyawa, sama ada ketika sihat, sakit, senang, susah, aman mahupun perang.

Bertitik tolak daripada itu, solat mesti dilihat sebagai jemputan Allah SWT kepada hamba-Nya untuk mereka berjumpa dengan-Nya lima kali sehari, siang dan malam tanpa ada sebarang perantaraan. Berhubung hal ini, Syekh Ramadan al-Buti menyatakan bahawa: "Solat ialah jemputan Allah SWT kepada hamba-Nya untuk kembali ke pangkuan-Nya agar Dia mengampunkan dosa-dosa mereka."

Ia selaras dengan hadis Rasulullah SAW: "Sesungguhnya Rasulullah SAW telah bertanya kepada sahabat baginda: 'Apakah pendapat kamu sekiranya di hadapan pintu terdapat sebuah sungai, lalu dia mandi di sungai itu setiap hari sebanyak lima kali, adakah akan tinggal kotoran pada dirinya?' Mereka menjawab: 'Tidak akan tinggal sedikit pun kotorannya.' Baginda bersabda: 'Demikianlah perumpamaan solat lima waktu, dengannya Allah menghapuskan dosa-dosa.'" (Hadis Riwayat Muslim)

Di samping itu, lafaz azan yang bermaksud 'marilah mendirikan solat' jelas menzahirkan jemputan Allah SWT yang memanggil



TRANSFORMASI minda terhadap solat boleh direalisasikan dengan melihat solat sebagai sumber ketenangan.

hamba-Nya ke hadirat-Nya.

Sekiranya kita menetapkan mindset bahawa solat ialah jemputan Allah SWT, raja kepada sekalian raja di alam ini, kita dapat berasakan betapa istimewa dan agungnya jemputan itu sehingga tidak ada sesuatu pun yang lebih besar daripada jemputan berkenaan. Justeru, kita sanggup meninggalkan semua perkara yang sedang dilakukan demi menyambut jemputan Tuhan Yang Maha Besar.

Selain itu, transformasi minda terhadap solat perlu dilakukan dengan memandang solat sebagai platform untuk kita berkomunikasi terus dengan Allah SWT terapa orang tengah. Mengenai hal ini, Ibn Atoillah al-Sakandari dalam salah satu kata hikmahnya berkata: "Solat ialah tempoh munajat". Ketika menghuraikan kata hikmah ini, Syekh Ramadan al-Buti berkata:

"Perkataan yang berasal daripada 'munajat' bermaksud 'musyarakah' iaitu penyertaan yang berlaku di antara dua pihak. Justeru, dapat kita fahami berlaku komunikasi di antara seorang hamba dengan Tuhannya ketika dia menunaikan solat. Allah SWT memberi respons terhadap setiap kata-kata yang diucapkannya. Hal ini terbukti dalam sabda Rasulullah SAW yang bermaksud: 'Allah berfirman: 'Aku membahagikan solat antara Aku dan hamba-Ku kepada dua bahagian dan bagi hamba-Ku apa yang dimintanya. Apabila hamba itu berkata: 'Segala puji bagi Allah, Tuhan sekalian alam, Allah SWT berfirman: 'Hamba-Ku telah

memuji-Ku.' Dan apabila hamba itu berkata: 'Yang Maha Pemurah lagi Maha Penyayang', Allah SWT berfirman: 'Hamba-Ku telah menyanjung-Ku...' (Hadis Riwayat Muslim)

Sesungguhnya kita sangat berhajat untuk berkomunikasi dengan Allah SWT. Ini kerana Dialah sebaik-baik tempat untuk kita mengadu, merintah serta mencari penyelesaian kepada semua masalah yang kita hadapi. Hanya Dia sahaja yang mampu melepaskan kita daripada segala kesukahan dilalui. Oleh itu, Allah SWT menyediakan satu platform untuk kita berkomunikasi dengan-Nya iaitu melalui solat. Allah SWT berfirman yang bermaksud: "Dan mintalah pertolongan (kepada Allah) dengan jalan sabar dan mengerjakan sembahyang." (Surah al-Baqarah ayat 45)

Justeru, jika ditukar cara pandang terhadap solat dengan menjadikannya sebagai ruang untuk berkomunikasi dengan Allah SWT, Tuhan Yang Maha Perkasa yang berkuasa memberi kesejahteraan hidup kita di dunia dan akhirat, solat tidak akan lagi terasa sebagai bebanan berat untuk kita dirikan.

Seterusnya, transformasi minda terhadap solat boleh direalisasikan dengan melihat solat sebagai sumber ketenangan. Realitinya, setiap individu tidak dapat lari daripada pelbagai bentuk ujian hidup yang menyebabkan kegelisahan. Kegelisahan ini tidak boleh dibiarkan, malah perlu dirawat kerana lama-kelamaan ia akan membawa kepada serangan

penyakit yang berbahaya.

Justeru, solat perlu didirikan untuk menghilangkan kegelisahan dan mendapatkan ketenangan. Ini kerana solat ialah salah satu bentuk zikir yang mengingatkan Allah SWT. Dia akan memberi ketenangan kepada sesiapa yang mengingati-Nya. Allah SWT berfirman dalam al-Quran yang bermaksud: "Ketahuilah dengan zikrullah itu, tenang tenteramlah hati manusia." (Surah al-Ra'd ayat 28)

Selain itu, solat ibadat yang paling mendekatkan seseorang hamba kepada Tuhannya. Rasulullah SAW bersabda yang bermaksud: "Posisi seorang hamba yang paling dekat dengan Tuhannya ialah ketika dia sedang sujud." (Hadis Riwayat Abu Daud)

Sudah pastinya seseorang yang berada dekat dengan Allah SWT akan disiram hatinya dengan ketenangan. Dengan itu, dia dapat menghadapi segala bentuk ujian hidup dengan reda, sabar dan tabah.

Sesungguhnya jika kita meletakkan mindset bahawa solat dapat memberi ketenangan, kita tidak akan meninggalkannya. Ini kerana kita tidak dapat lari daripada kegelisahan akibat bergelut dengan seribu satu ujian dalam kehidupan di dunia ini. Justeru, kita akan menjadikan solat sebagai ruang untuk recharge semula jiwa kita yang penat.

Begitulah transformasi minda terhadap solat yang perlu kita lakukan. Peristiwa Israk Mikraj berulang saban tahun mengingatkan kita tentang penyertaan ibadat solat ini.

Namun, persoalannya adakah mutu solat kita semakin meningkat dengan pertambahan tahun atau masih tahap yang sama atau semakin menurun? Malah, lebih buruk lagi, adakah kita meninggikan solat? Ini kerana Allah SWT menjanjikan ganjaran yang sangat lumayan kepada sesiapa yang menjaga solat. Allah SWT berfirman yang bermaksud: "Dan mereka yang tetap memelihara sembahyangnya; mereka itulah orang yang berhak mewarisi Firdaus, mereka kekal di dalamnya." (Surah al-Mukminun ayat 9-11)

**Penulis Pensyarah Kanan
Pusat Pengajian Bahasa,
Tamadun dan Falsafah,
Universiti Utara
Malaysia (UUM)**